



Dapli attractivitat per il Lai Barnagn

Questa saira propona la supprastanza communal da Surses in credit dad 1,8 milliuns.

6



Duas exposiziuns en il Center d'art Nairs

«Mare e Monti» e «Common Affaires» sa cloman las 2 exposiziuns actualas en il Center d'art Nairs.

7

LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

Il marcau dallas emoziuns

Ils 29 da november 2018 arva la Kindercity a Flem

DAD AUGUSTIN BEELI / ANR

■ Il center Stenna a Flem ei da present ella fasa finala da construcziun. El futur vegn Flem ad esser la destinaziun perviadis da scola, e quei exact en quei stabiliment gigantic. Gievgia vargada ha Jean-Christophe Gostanian, il CEO da Kindercity, presentau la pli nova attracziun turistica dalla regiun. Igl ei buc ina pendiculara. Ils 29 da november 2018 arva Kindercity Flem-Laax-Falera. Il parc ludo-scientific vegn ad esser semtgau el center Stenna a Flem. Per hotellaria, parahotellaria e l'entira destinaziun da vacanzas vegn ei ad esser in peglias. Per affons da treis tochen 12 onns dat ei ina pluna attracziuns tenor il motto «Scuvierer scienza e tecnica da maniera ludica». Tut ei special en quei stabiliment, maschinas, mecanica, ina porschida unica ch'ei dat negliu auter. Che la Kindercity vegn a Flem – e buc a Cuera, Domat ni Tavau – ei d'attribuir al fatg che Jean-Christophe e Sandrine Gostanian vegnan dapi biars onns en vacanzas a Flem. «Edutrainer» senunnan las personas che lavuran



Il baghetg dil center Stenna ha retschiert a Flem il surnum «porta-aviuns». Ils 29 da november s'etablescha cheu sin treis alzadas la secunda Kindercity en Svizra.

FOTO A. BEELI

el niv paradis per affons ch'els arvan. 60 piazzas da lavur parziala porscha Kindercity a Flem, Gostanian collavura culla Scol'aula da pedagogia dil Grischun, cun Flims

Electric ed ulteriuras instituziuns e firmas dalla regiun. Sco quei che Jean-Christophe Gostanian ha confirmau all'anr arva el la primavera 2019 ad Yverdon-les-Bains el

cantun Vad ina quarta Kindercity en Svizra. La Kindercity a Flem vegn denter auter a tematisar l'aua.

> PAGINA 3



Da sen. Vreni Müller-Hemmi, presidenta dalla cuminonza, ils portaders digl'empre «Cardun d'argien» Edi e Silvia Hess sco era Werner Strebel.

FOTO H. HUONDER

Honorau menaschi da bio

«Cardun d'argien» per Edi e Silvia Hess

DA HANS HUONDER / ANR

■ La Cuminonza dils possessurs da secundas habitaziuns da Tujetsch ha honorau il menaschi puril da bio dad Edi e Silvia Hess. Els ein aschia ils portaders digl'empre «Cardun d'argien». Il premi ei vegnius surdaus per l'emprema ga uonn. Cun quel du-ein prestaziuns extraordinarias vegnir distinguidas. Sco quei che la giuria constatescha ademplescha il menaschi puril Hess plirs impurtonts criteris. «D'ina vart eis el ecologic ed ha il dui respect dalla na-

tira, dall'autra vart eis el sesaviart per la publicitad», constatescha Werner Strebel, commember dalla supprastanza dalla cuminonza. Il «Cardun d'argien» ord arschella ch'els han obtenu sco reconuschienscha ei vegnius scaffius digl'empre indigen Hubert Venzin. Cun in document da reconuschienscha ein il Lag da Claus e la camona da Maighels vegni undrai. 195 ni 61 perschies da tuts commembers dalla cuminonza ein separticipai alla tscherna.

> PAGINA 5



Leo Derungs, pur a Camuns, ei presents ella Casa d'Angel sin duas fotografias cul tetel «surpresa».

FOTO A. BEELI

Seconfruntar cun midadas

■ (anr/abc) Dumengia vargada ei la nova exposiziun ella Casa d'Angel a Lumbrein s'aviarta. Il tetel dall'exposiziun d'uonn secloma «midadas/Wandel». Ins ha giu gust d'ir alla tscherca dallas midadas che la curatura d'uonn, Chantal Störmer, ha concepiu. Ella sala gronda dalla Casa d'Angel a Lumbrein dattan gl'emprem ils maletgs en egl. Igl ei ina seleccziun che la curatura ha eligi ord la vasta collecziun dalla Fundaziun Capauliana. Vid la preit encunter las combras pendan fotografias che muossan il cuntrast «ier

– oz». Il schurnalist e fotograf Charly Bieler ha fatg las novas, ei sepostaus els loghens nua ch'els fotografas d'antruras fuvan stai per haver la perspectiva ideala. Sillas lautgas, en stiva biala, en stiva da filar, ella combra davon e la combra davos ha la curatura piazzau maletgs ed objects. L'exposiziun «midadas/Wandel» ei pintga, mo concentrada, rappresentativa e surveseivla. Vitier ha la premurada menadra dalla Casa d'Angel scaffiu in program accumpignont attractiv.

> PAGINA 4

Ei vegn investau memia pauc

■ (anr/abc) Il cussegl turistic dil Grischun ha ediu in cumpendi programmatic. Gievgia ha l'Uniu da commerci e mistregn Flem-Laax-Falera envidau ad ina discussiun surlunder. Encunter la fin dall'occurrnza, durant la runda da damondas, ha ina dunna vuliu saver sch'ins hagi gia sentiu in effect dil cudisch programmatic. Il parsura digl'Uffeci grischun d'economia e turissem, Eugen Arpagaus, ha rispundiu. Il cudisch han ins presentau igl unviern vargau en tuttas regiuns dil Grischun. Per bia buca tuts turistichers han recepiu il messadi ed era la populaziun buc. Per quei sappien ins buca sch'il «Weissbuch» hagi fatg effect. Las tesas ein veramein provocontas. Era la presentaziun enteifer l'Uniu da commerci e mistregn Flem-Laax-Falera ha animau da tschentar damondas provocontas. Ei vegni investau bia memia pauc en innovaziuns e renovaziuns da structures, ha Ernst A. Brugger manegiau all'entschatta. En sia presentaziun comunabla cun Arpagaus ha el getg: «Ina crisa zuppada ei bia pli prigulusa e grevionta.» El ha rendiu attent alla situaziun ch'ei va bein cull'economia, mo ch'il regress ei evidents.

> PAGINA 3

«Tiradurs e voluntaris cuntents»

Il Tir cantunal Grischun 2018 va ella fasa finala

■ (anr/gv) Suenter duas fins d'jamna astga il comite d'organisaziun dil Tir cantunal Grischun 2018 gia trez ina emprema bilanza positiva. Quei fa era Leonard Casutt dil comite local da Laax-Falera: «Ils tiradurs ed ils gidonters ein happy.» Il capotiradur da Falera astga esser dubel cuntents cul tir cantunal. Ella rangaziun dalla concorrenza da

fiasta culla buis da 300 meters era el ier suentermiezdi aunc sil 13avel rang dils total 152 tiradurs ch'han sittau ils siat stes necessaris. Emprem ella rangaziun provisoria era Martin Zaugg dil cantun Soloturn e sil secund rang ei Pascal Bachmann da Kyburg. Culla buis da 50 meters ei vinavon Manuel Lüscher da Buochs alla testa, sin rang treis ei

Lars Färber da Domat. Culla pistola ein Hansruedi Götti dad Altstätten (50 m) ed Elmar Falett dalla Val Müstair (25 m) alla testa. Oz setta Heidi Diethelm Gerber culla pistola a Mustér. Ella ha gudignau als Giugs olimpics a Rio de Janeiro l'emprema medaglia per la Svizra.

> PAGINA 2



Al Di dall'armada ha Lucas Caduff brigliu cun in plaid da fiasta en quater lungatgs.

FOTO G. VENZIN